

宋史新編

宋史新編卷一百八十三

列傳一百二十五

明南京戶部主事莆田柯維騏著

外戚下

王貽永

李迥勛

子端懿端愿端懿

高遵裕

弟遵惠分封士林士村子公紀公紀子世則

向傳範

從姪經紹經子宗回宗良

張敦禮

任澤

孟忠厚

鄭興裔

韋淵

錢忱

邢煥

吳益

弟蓋

潘永思

夏執中

李道

韓同卿

楊次山

子谷

王貽永字季長溥之孫也初名克明頗通書不好聲妓

尚太宗女升父行改今名授右衛將軍駙馬都尉歷遷  
節度使樞密使久之拜同中書門下平章事遂加兼侍  
中徙鎮海軍節度使以疾求罷仁宗冀其愈聽罷侍中  
徙鎮彰德至和初復以疾辭拜尚書右僕射檢校太師  
兼侍中景靈宮使卒贈太師中書令諡康靖當時無外  
姻輔政者貽永能遠權勢迄無過失人稱其謙靜

李遵勗字公武崇矩孫也好爲文詞第進士大中祥符  
間召對便殿尚荆國大長公主初名勗帝益遵字升其  
行爲崇矩子授左龍武軍駙馬都尉累遷寧國軍節度  
使徙鎮國軍知許州以疾請援唐韋嗣立故事求山林

號不許初天聖間章獻太后屏左右問曰人有何言遵  
勗不答固問之曰臣無他聞但言天子旣冠太后宜以  
時還政太后曰我非戀此但帝少內侍多恐未能制也  
又嘗上三說五事論時政補助居多師楊億爲文億卒  
爲制服又與劉筠友善恤其遺孤通釋氏學將死與浮  
圖楚圓爲偈頌卒贈中書令諡和文有閒宴集二十卷  
外館芳題七卷主太宗女也善筆札能爲歌詩尤精女  
工居夫喪衰麻未嘗去身服除不復御華麗晚病目真  
宗親舐其鬚左右感泣帝亦悲慟曰先帝伯仲之籍惟  
大主在奈何嬰斯疾竟喪明卒子端懿端愿端慤曾孫

涓

端懿字元伯性和厚喜問學頗通陰陽醫術星經地理之學七歲授如京副使歷華州觀察使以母喪起復爲鎮國軍節度觀察留後顧終制許之服除提舉集禧觀出知鄆州兼京東西路安撫使置弓手局教以戰鬪遂如精兵治汶陽堤百餘里以却水患民便之尋除寧遠軍節度使知澶州御史中丞韓絳奏端懿無功不當得旄節不拜以留後赴澶州數月卒贈感德軍節度使諡良定再贈兼侍中端懿能自刻厲聞善士傾身下之以故士大夫與之遊甚得名譽

端愿字公謹以舊歷邢州觀察使鎮東軍留後知襄郭  
二州移廬州富弼謂曰肥上之政何以減於襄陽端愿  
曰初官喜事飾廚傳以千名則譽者至更事既久知抑  
豪彊制猾吏故毀隨之弼以爲然英宗拜武康軍節度  
使知相州請歸除醴泉觀使神宗城羅兀端愿手寫趙  
普諫太宗北伐疏以聞連年請老以太子少保致仕哲  
宗立進太子太保卒贈開府儀同三司子評歷成州團  
練使知蔡州卒贈冀州觀察使

端慤字守道累官至安德軍留後卒贈昭德軍節度使  
諡恭敏兄端懿在嘉祐時嘗密請建儲人無知者卒於

澶淵端慤走護其喪以歸元豐間因進對袖舊蒙上之神宗歎曰近世之賢戚也由是端慤之名益著

涓字浩然以蔭至通直郎知鄂州崇陽縣靖康元年京城被圍羽檄召天下兵鄂部縣七當發二千九百人皆未集涓獨以所募六百銳然請行募士多市人不能軍涓出家錢買牛酒激犒之卽日引而東北過淮蒲圻嘉魚二縣之兵始至合而前至蔡涓馳馬先犯敵鋒乘勝追北十餘里大敗敵遇飛矢蝟集二縣兵亟舍去涓創甚猶血戰遂死焉年五十三贈朝奉郎官其三子高遵裕字公綽宣仁皇后之從父瓊之孫也以

遷至秦鳳路沿邊安撫副使時用王韶復洮隴以古渭  
爲通遠軍命遼裕知軍事明年持附順羌部圖籍及繪  
青唐武勝形勢入獻擢引進副使帶御器械俾歸治師  
師進營武勝城下羌衆逃去遂據其城詔建爲鎮洮軍  
又命知軍事等以熙河洮岷通遠爲一路進西上閣門  
使榮州刺史充總管復知通遠軍明年安撫使王韶欲  
取河州遼裕曰古謂舉事先建堡砦以漸而進今兵糧  
不備難以圖遠韶攻河州果不克神宗善遼裕議令專  
管洮岷疊巖示款附者旣而從韶取岷州下之令士衆  
曰生獲老幼與得級同全活者數萬捷聞加岷州刺史



明年羌圍河岷二州遵裕命將合擊之特朝廷以岷難  
守議棄之詔至賊已潰矣以功進團練使龍神衛都指揮  
使知熙州連坐事黜知淮陽軍元豐四年復知慶州  
詔與諸路討夏國又令節制涇原兵劉昌祚先至靈州  
幾得城遵裕嫉之故不用其計遂以潰歸語在昌祚傳  
熙州團練副使哲宗立復右屯衛將軍主管中獄廟  
卒累贈奉國軍節度觀察留後從弟遵惠

遵惠字子育以蔭爲供奉官熙寧中試經義中選換大  
理評事歷遷戶部侍郎以龍圖閣學士知慶州卒年五  
十八贈樞密直學士方宣仁后臨朝繩

度乃舉家事付遵惠遵惠躬表率之人無間言亦能遠嫌自保故不惟紹聖之禍從姪士林

士林字才卿宣仁皇后弟也累官內殿崇班殿直英宗書謹字法律四字誨之曰能此則爲良吏矣每欲進擢后屢辭輒止喜儒學涉閱經史通大義其卒也加贈昭德軍節度使子公紀

公紀字君正歷遷永州防禦使集慶留後性儉約珍異聲妓無所好奉祿悉給諸族得任子恩均及孤遠卒贈感德軍節度使諡懷僖向宗追封新興郡王子世則世則字仲貽以恩補官歷康州防禦使知西上閤門事

宣和末金泛使至徽宗命世則掌客記問該洽應對有據自是掌客多命世則金入軍城下又使其軍還進秩二等遷知東上閤門使高宗爲康王在艱難中世則常在左右寢處不少離及卽位累遷感德軍節度使充萬壽觀使進開府儀同三司奉朝請賜第臨安除景靈宮使兼判溫州尋以病勾罷後爲萬壽觀使紹興十四年召入觀進少保懇求還卒贈少傅諡忠節

向傳範字仲模敏中之子以父任爲衛尉丞娶南陽郡王惟吉女改內殿崇班帶御器械歷知鄆州兼京西路安撫使以密州觀察使卒贈昭德軍節度使諡忠惠

範宰相子聯戚里所至有能稱以橐中貲千餘萬葬族  
人在殯者六十餘喪姪經綜

經字審禮駕部員外郎傳亮之子以蔭至虞部員外郎  
神宗爲穎王選經女爲妃改莊宅使帝卽位妃爲皇后  
進光州團練使以維州防禦使知陳州歲大雪輒弛公  
私餽錢以寬民有司持不可經曰上使我守陳民窮蓋  
我責我自爲此不爾累也方鎮別賜公使錢例私以自  
奉去則盡入其餘經獨斥歸有司知河陽會旱蝗民乏  
食經度官廩歲用無餘乃先以圭田租入振救之富人  
爭出粟多所濟活徙徐州累遷定國軍留後復出知壽

州卒年五十四贈侍中諡康懿賜碑篆首曰忠勤懿戚  
經所至勤吏治事皆自省決頗欲以才見於用故數請  
外補累世追封王爵語在敏中及后傳子宗回宗民  
綜字君章知歙縣籍閭里惡少年有盜發用以推迹輒  
得歷知隨鼎漳汾沁稷沂七州性寬裕善治劇於姦惡  
不少恕官累中散大夫

宗回字子發歷官觀察留後諸鎮節度使檢校司空封  
郡王開府儀同三司崇寧初有告其陰事者削官流柳  
州行二日聽家吾省咎踰年盡還其故官宗回少驕恣  
殖小才嘗權群牧都監數以蕃恩被賞出知

賊殲其黨類歲饑發廩興役饑者得濟而官舍帑廩一新卒贈檢校少師謚榮縱

宗良字景弼歷觀察留後諸鎮節度使末嘉郡王開府儀同三司欽聖后臨朝時陳瓘嘗論其與蔡京相結及預政事亦能恪共自守卒贈少保

張敦禮熙寧元年選尚英宗女授左衛將軍駙馬都尉遷密州觀察使元祐初疏言變法易令始於王安石成於蔡確近者退確進司馬光以臣觀之所得多矣進武勝軍留後章惇爲政言敦禮詆毀先烈引譽罪首責授左千牛衛大將軍徽宗立遷正寧遠軍節度使諫官王

能甫言神宗禮遇優渥而敦禮詆毀盛德今復與之節  
鉞無乃傷陛下紹述之志乎乃奪節仍爲集慶軍留後  
大觀初復節度寧遠軍徙雄武卒贈開府儀同三司  
任澤字天錫濮王夫人之弟也累官嘉州刺史卒贈崇  
信軍節度使謚恭僖澤際會恩寵能自安繩檢英宗欲  
廣其居固辭當任子弟請其篤謹如此

孟忠厚字仁仲昭穆皇后兄彥弼子也后被廢哲宗恩  
眷不衰故忠厚得以仕進靖康元年權衛尉卿二帝北  
遷張邦昌迎后聽政后遣忠厚持書遣康王王卽位尊  
后爲太后累除忠厚顯謨閣直學士臺諫六章論列高

宗以太后故難之后聞卽命易武秩趙鼎謂張浚曰太  
后復辟其功甚大當推恩外家浚乃奏忠厚爲寧遠軍  
節度使后崩以祔廟忌起復鎮海軍節度使開府儀同  
三司及后大祥封信安郡王充禮儀使歷判紹興府兼  
脩奉攢宮事加少保及營佑陵秦檜當爲總護使憚往  
乃除忠厚樞密使代其行檜與忠厚僚壻也然心實忌  
之山陵事畢忠厚欲歸樞府檜諷言路引故事論列遂  
判福州改判建康又改判紹興會郊赦加恩謝表中丞  
詹大方希檜意論忠厚表辭輕侮罷爲醴泉觀使檜死  
召還行在授保寧軍節度使判平江再改判紹興過闕



入見復詔充萬壽觀使提舉祕書省卒贈太保忠厚奉  
太后訓避遠權勢不敢以私干朝廷明受之變太后垂  
簾忠厚乞裁節本家恩澤帝念擁佑功故眷忠厚特優  
其卒也三子皆除直祕閣官其親屬六人從父彥卿爲  
潭州通判建炎三年潰兵杜彥自袁州入瀏陽遂犯善  
化長沙二縣彥卿率民兵拒之賊勢挫俄而民兵有自  
潰者賊遂乘之斬彥卿支解以徇添差通判趙民彥以  
民兵赴之鏖戰瀏陽城南爲賊所得邑士謝淳帥民兵  
爲前鋒助民彥戰亦被執併遇害事聞竝贈官錄其子  
後先熹帥湖南請立廟從之

鄭興裔字光錫初名興宗父蕃和州防禦使祖翼之陸  
海並節度使曾祖知太師封樂平郡王謚僖靖神顯肅  
皇后父也興裔早孤叔父藻以子字之分以餘貲不受  
請立義莊贍宗族乃藻沒解官致追報之義初以后恩  
授成忠郎充幹辦祗候庫歷福建路兵馬鈐轄過闕入  
見詢守令臧否對甚悉孝宗曰卿識時務習吏事行當  
用卿會復置武臣提刑就命爲之加領高州刺史帝善  
其數論事加成州團練使累差浙東浙西江東提刑請  
祠歸尋知閤門事兼幹辦皇城司又兼樞密副都承旨  
軍婦楊殺鄰舍兒取其臂釧棄其屍獄成刑部以無證

左出之命興裔覆治得實帝喜賜居第遷至潭州觀察  
使復請祠起知廬州移揚州郡大治紹熙初遷保靜軍  
承宣使召領內祠充明堂大禮都大主管大內公事寧  
宗立除知明州兼沿海制置使告老授武泰軍節度使  
卒年七十四贈太尉諡忠肅興裔歷事四朝以材名結  
主知中興外族之賢未有其比子損登進士甲科薄亦  
以后恩至太尉保信軍節度使卒封榮國公諡端靖

韋淵顯仁太后季弟也靖康末官至忠州防禦使高宗  
卽位遷寧州觀察使知東上閤門事言橫行五司尚奉  
遵元豐舊制乞併引進司歸客省東西上閤門合而爲

一以省冗費從之遂命同管客省四方館閣門事淵性  
暴橫不循法度帝慮其有過難於行法遂遷福建路副  
總管淵引疾勾祠許之久之落階官除德慶軍節度使  
召赴行在除開府儀同三司帝久不予淵官聞太后將  
入境乃封平樂郡王令逆于境上既從后歸卽令致仕  
又詔奉朝請遷少師淵在內不得逞乞致仕任便居住  
從之未幾帝恐其肆橫於外復詔落致仕還居賜第太  
后朝景靈宮淵見后出言詆毀責授寧遠軍節度副使  
袁州安置數年復故職累遷太保太傅卒贈太師子三  
人訊謙讜訊紹興中官至達州刺史坐過用太后旨降

武德郎與嶺外監當謙好學能詩官至建康軍節度使  
謙子璞累官明州觀察使十年不遷寧宗嘉其恬退授  
清遠軍節度使致仕卒贈太尉

錢忱字伯誠吳越王俶五世孫父右領軍衛大將軍景  
臻尚仁宗女生忱靖康之難主以先朝女幸而免先是  
戚里例納節旣南渡主爲忱請還舊官以爲瀘州節度  
使進開府儀同三司封榮國公紹興末以少師致仕卒  
年八十餘贈太師忱歷事五朝靖共不解高宗書忠孝  
之家賜之子端禮自有傳

熊煥字文仲開封人以父任歷開封府土工儀曹詔納

其女爲康王妃王卽位連進徵猷閑待制諫議大夫衛  
膚敏言后父不當班從臣遂改光州觀察使除樞密都  
承旨煥屢奏馬伸言事切當宗澤忠勞可倚黃潛善汪  
伯彥誤國其言多所裨益擢至慶遠軍節度使提舉洞  
霄宮煥涉學有文節儉自持未嘗恃恩私請識者取焉  
卒贈開府儀同三司諡恭簡加贈少師追封嘉國公  
吳益字叔謙蓋字叔平但憲聖皇后弟也竝以恩補官  
高宗與后皆喜翰墨故益蓋兄弟師法亦有書名帝爲  
置皇后宅大小學教授以王鉉爲之益娶秦檜孫女又  
與王繼先次相薦引故三家姻族皆躋美官益旣建節

以檜故授文資累加祕閣修撰直徽猷閣又加直寶文閣檜死又升敷文閣待制中丞湯鵬舉乞褫職名以示至公自是不復遷顯仁太后葬爲櫬宮總護使始進少保孝宗嗣位再進太師封泰寧郡王卒諡莊簡追封衛王蓋亦至節度使累升太尉開府儀同三司少保封新興郡王卒贈太傅追封鄭王益子堪習吏事歷鎮安爲節度使復以才選除知明州兼沿海制置使位至少師判建康府兼留守堪嘗使金人嘉其信義兄弟璿蓋子璲並至節度使

潘永思賢妃叔父也建炎初爲閣門宣贊舍人帶御器

械盧益頗與之交結爲諫官吳表臣所論奪職旣而辛  
企宗言未思嘗捕魔賊有功復爲帶御器械未幾又坐  
事追一官擢至右武大夫知閣門事卒

夏執中成恭皇后弟也累遷奉國軍節度使提舉萬壽  
觀寧宗卽位加少保執中旣貴始從師學作大字頗工  
復善騎射高宗行慶壽禮近戚爭獻珍環執中獨大書  
一人有慶萬壽無疆以獻高宗喜錫賚甚渥嘗爲館伴  
副使連射皆命中金人駭服孝宗聞其才將召用之謝  
曰他日無累陛下保全足矣人以此益賢之

李道字行之相州人其中女爲光宗后初道與兄旺聚



衆歸宗澤澤因事斬旺命道掌其軍澤卒道引軍依襄陽鎮撫使桑仲仲以爲副都統制兼知隨州奏于朝授武義郎閣門宣贊舍人仲爲霍明所殺道與統制李橫率兵縞素圍明于郢明亡去劉豫遣人持書招道道不從執其使以聞詔嘉獎之豫怒遣將穆楷攻道道拒破之領策州團練使進武義大夫胡安中守唐州勢孤不能自立遂附豫道招之安中復來歸會李成入寇鎮撫使李橫棄襄陽去道亦棄隨南歸後累功至龍神衛四廂都指揮使遷鎮兩軍承宣使歷捧日天武四廂都指揮使知荆南府隆興初湖北諸司劾其過帝曰道歷版

里妄作可罷久之再爲湖北副總管及卒乃拜慶遠軍節度使贈太尉諡忠毅后既貴進封楚王孫孝友孝純皆至節度使

韓同卿恭淑皇后父也累遷慶遠軍節度使加太尉卒贈太師諡恭靖同卿季父侂冑聲勢熏灼同卿每懼滿盈不敢干政時天下皆知侂冑爲后族不知同卿乃后父也侂冑敗人始服其識云

楊次山字仲甫恭聖仁烈皇后兄也其先開封人曾祖全以材武奮靖康末捍京城死事祖漸以遺澤補官仕京師家于越之上虞次山儀狀魁偉少好學能文補右

學生以后恩得官至岳陽軍節度使累加太保授安德  
昭慶節度使改封會稽郡王次山能避權勢不預國事  
時論賢之卒年八十一贈太師追封冀王子二人谷至  
太傅保寧軍節度使充萬壽觀使永寧郡王石字介之  
乾道間入武學以后貴賜第至保寧節度使進封信安  
郡侯又以檢校少保進封開國公寧宗崩宰相史彌遠  
謀廢立命石與谷白后事在楊后傳理宗既立並授開  
府儀同三司充萬壽觀使時寶慶垂簾人多言本朝世  
有母后之聖石獨曰事豈容槩言昔仁宗英宗哲宗嗣  
位或尚在幼冲或素絲撫育軍國重事有所未諳則

后臨朝宜也今主上熟知民事天下悅服雖聖孝天通  
然不蚤復政得無基小人離間之嫌乎乃密疏上之后  
覽奏卽命擇日徹簾進石少保封永寧郡王後進太傅  
石性恬澹每拜爵命必力辭及恭聖祔廟除太師兄谷  
疑於辭受石力言吾家非有元勳盛德竊恐自速顛覆  
乃合疏懇辭至再三不受及屬疾除彰德集慶節度使  
進封魏郡王卒年七十一贈太師

東史新編卷一百八十三

宋史新編卷一百八十四

列傳一百二十六

明南京戶部主事莆田柯維騏著

宦者

占者閹寺司宮門之禁令楊園畝丘之詞甚遜蓋其所處然也後世品秩寢優而謹飭幹敏者率蒙眷預謀議不幸邪佞乘之非有內嬖則有外虞若宋之童貫梁師成康履藍珪釀成靖康明受之禍方之昔轍奚異矣神宗之言曰人才無類顧駕御何如歷代明君曷嘗不畀之事任然豈至於僭越陵夷也夫苴茅分虎列門戟典禁兵漢唐之紀綱大壞而徽宗崇以師傳尤可為朝廷

羞高宗之寵未極故其禍易弭然豺狼噬而殞首蝮蛇  
螫而斷腕均之爲身害也嗚呼率先訓者無愆政鑒前  
事者無後患奈二君之闇何

劉承規

秦翰

附 關承翰

王繼恩

附 李

李神福

周懷政

張崇貴

張繼能

衛紹欽

石全彬

雷允恭

任守忠

閻文應

藍繼宗

張惟吉

甘昭吉

李憲

宋用臣王中正  
后得一附

張茂則

李舜舉

梁從吉

附 李詳

陳衍

程昉

蘇利涉

童貫

附 方臘

梁師成

楊戩

馮世寧

邵成章

關禮

藍珪

康履附

馮益

張去爲

陳源

甘昇

王德謙附

董宋臣

劉承規字大方山陽人建隆中補高班歷事太宗真宗  
宣政使應州觀察使未幾以疾求致仕不允特置景  
福殿使名以寵之班在客省使上仍改新州觀察使作  
歌賜焉本名承珪上爲取道家易名度厄之義改珪爲  
規疾甚再求罷以檢校太傅左驍衛上將軍安遠軍節  
度觀察留後致仕卒贈左衛上將軍鎮江軍節度謚忠  
肅承規掌內藏三十年動著條式又製定權衡法語在  
律曆志尤好伺察人多畏之真宗崇瑞命修祠祀飾宮

觀承規皆預聞督玉清昭應宮尤爲精麗咸平中館閣  
編著讎校之事悉典領頗好儒學喜聚書間接名士實  
訪故實或密爲延薦自寢疾惟以公家務爲念云

秦翰字仲文真定人太平興國中崔彥進擊契丹翰爲  
都監以善戰聞累遷入內押班以擒趙保忠功加崇儀  
副使歷靈環慶州清遠軍諸路都監真宗時歷涇原儀  
渭鈐轄遷至皇城使入內都知以翰在邊久特置是名  
寵之改昭宣使又爲群牧副使祀汾陰亳州翰扈從凡  
行在細務悉令裁決加領平州團練使卒年六十四翰  
個儻有武力以方略自任前後戰鬪身被五十創嘗因



出使屢出入李繼遷帳中間白太宗願手刺此賊死無所恨性溫謹接人以誠羣帥剛狠者皆得其懽心輕財好施衆樂爲用其歿有泣下者重贈彰國軍節度詔楊億撰碑文億以其不蓄財表辭所資同時閭承翰積官作坊使入內都知嘗歷川峽都監鎮定等路排陣都鈐轄有功領群牧國信二司多規置然性剛強過檢察視秦翰不逮云

王繼恩陝州人周爲內班高品初養於強氏名德鈞開寶中復本宗賜名焉歷武德使太宗立累遷昭宣使賜甲第蜀李順亂命爲劔南兩川招安使討順獲之朝儀

賞功欲除宣徽使上曰朕讀前史不欲令宦官預政宣徽使執政之漸也宰相請之力上怒別立宣政使序位昭宣使之上授之進領順州路防禦使繼恩喜宴飲每出入前後奏音樂以博局棋枰自隨僕使輩用事悉播縱所部剽掠軍士亦無鬪志餘賊復陷州縣上命入內押班衛紹欽同領其事又遣樞密直學士張鑑等督之高品王文壽著隸繼恩文壽御下嚴急爲指揮使張麟所殺麟卽以所部與嘉州賊帥張餘合勢甚盛奏至近臣請招撫因可破賊於是亡卒斬麟函首送繼恩皆自拔來歸因使爲鄉導擊賊悉平之至道二年春布衣韓

拱辰詣闕奏繼恩功當秉機務上大怒以拱辰惑衆杖  
脊黥面配崖州俄召繼恩還太宗崩按行山陵加領桂  
州觀察使繼恩初事太祖特承恩顧及朋夕中夜馳詣  
府邸請太宗入太宗忠之故寵遇莫比士大夫好進者  
悉趨焉真宗初益豪橫頗欺罔泄機事與參知政事李  
昌齡緘題往來多請託至有連宮禁者素善胡旦時將  
加恩密誘爲褒辭又士人詩頌盈門坐朋比黜爲右監  
門衛將軍均州安置籍沒貲產多蜀土僭擬物昌齡責  
忠武軍節度行軍司馬旦削籍長流尋州繼恩卒貶所  
後追復官爵恤其家初李順之獲也侍御史知雜事呂

夷簡按奏以爲非是真宗置不問逮景祐中有人告太子順尚在廣州巡檢使陳文璉捕得之囚赴闕覆按皆實朝廷以平蜀將士功賞已行不欲暴其事第斬順資文璉二官順初起悉召鄉里富人大姓令具所有財粟據其生齒足用外一切發賑貧乏錄用材能存撫良善所至無所犯時兩川大饑旬日間歸者數萬人及敗人尚懷之故得脫去三十餘年始就戮云

李神福開封人少給事晉王府歷事真宗遷至宣政使授宣慶使領昭州防禦使先是諸司使止宣政特置使額寵之卒贈潤州觀察使神福恭愿每爲衛紹欽詬罵

皆不校在禁闥二十年稱爲長者然父掌三班無規制不能拒請託人譏其所守同時內侍有竇神寶鄧守恩王仁睿與神福弟神祐並以謹恪稱云

周懷政并州人累至入內高品祥符大禮皆爲都監遷至左藏庫使後領英州團練使加昭宣使懷政日侍內廷權任尤盛中外帑庫皆得專取多入其家位望居右者必排抑之酷信妖妄有朱能者本厠養爲人凶狡遂賂懷政親信得見因與侍卒姚斌妄談神怪以誅之懷政大惑援能至御藥使領階州刺史俄於終南山脩道觀與劉益輩造符命託神言國家休否臧大臣寇準

鎮永興能爲巡檢倚準舊望欲實其事準好勝喜其附  
已多依違之朝臣屢言懷政之妄真宗含忍不斥然漸  
踈遠之懷政憂懼會準罷相懷政愈畏獲譴不自安天  
禧四年七月謀潛召客省使楊崇勲內殿承制楊懷吉  
閣門祗候楊懷玉會皇城司期以二十五日竊發殺了  
謂等復相寇準奉帝爲太上皇傳位太子前夕崇勲懷  
吉密告謂謂卽夜偕二人至曹利用第計議翌日利用  
入奏收懷政斬于城西普安寺懷玉次日始詣樞密院  
自陳亦坐貶擢崇勲懷吉官遣入內供奉官盧守明鄧  
文慶馳驛捕朱能等能偵使者至裏甲出殺守明以叛

發兵捕之能入桑林自縊死都巡檢李興等斷能及其子首以獻劉益等十一人磔于市道士王先等處死素與懷政能交結相稱薦皆論罪寇準再貶道州凡與準厚善者悉降黜焉

張宗貴真定人事太祖太宗嘗與李繼隆共討李繼遷降之累遷崇儀副使內侍右班副都知繼遷復叛圍靈州急太宗將棄之廷議未決命宗貴與馮訥乘傳往議其事乃益兵固守就命爲靈環慶州清遠軍路監軍又爲排陣都監真宗立拜洛苑使右班都知管勾并州軍馬使繼遷還加六宅使咸平元年又命管勾鄜延屯兵

泊延安改駐泊都監又爲鈴轄其後繼遷復內擢崇貴  
與張守恩擊敗之又與王榮禦賊再詔褒飭四年領獎  
州刺史復莅鄜延仍制置沿邊青白鹽事景德元年繼  
遷死子德明幼崇貴移書諭朝廷恩信自是邊防事宜  
皆崇貴專主之二年春召赴闕面授方略許德明以定  
難節度西平王聽回圖往來放青鹽禁凡五事而令德  
明納靈州土疆遣子弟入宿衛凡七事德明悉如約惟  
以子弟入質及納靈州爲難故亦禁鹽如舊不許回圖  
三年九月以德明誓表來上拜皇城使內侍左右班都  
知領博州團練使大中祥符元年加昭宣使崇貴久



邊書識羌戎情偽西人畏服每德明有所論述及境上  
交侵皆先付裁制嘗請置緣邊安撫使如北而之制上  
曰增置署局徒爲張皇不若委卿靜制之卒年五十七  
贈豐州觀察使

張繼能字守拙太原人事太祖太宗遷高品契丹入寇  
命爲尚陽鎮定路先鋒都監累敗之轉殿頭高品後累  
敗李繼遷遷至供備庫副使歷涇原儀渭都巡檢使其  
宗卽位遷崇儀使歷亦寧駐泊都監夏人寇清遠坐逗  
遛不時赴援長流澹州景德二年赦還歷廊延都鈐轄  
德明雖受朝命而羌部不絕寇境繼能日課卒戡竹爲

簽署字其上且言以備將士記殺獲功狀賊聞之甚惧  
歸朝兩坐事降遷至內園使掌瓊林苑卒贈汀州團練  
使繼能性沉密知兵頗勇敢喜讀書然好治生晚年急  
於聚蓄衆以此少之

衛紹欽開封人由太宗藩邸被親倚累擢入內押班加  
崇儀副使同王繼恩平蜀寇真宗時歷昭宣使卒紹欽  
苛虐少恩不爲衆所附太平興國中江東有僧詣闕請  
修天台壽昌寺且言寺成願焚身以報太宗允其請命  
紹欽往督營繕既訖役遽積新於廷請僧如願僧言欲  
見至尊面謝紹欽曰昨朝辭日親奉德音不煩致謝僧

惴怖偃蹇顧道俗望有救之者紹欽卽促令躋新上以  
又抑按而焚之

石全彬字長卿真定人父知顥由內中尚書事太祖太  
宗真宗遷至莊宅使歷并代州鈐轄卒全彬以知顥奏  
補至西頭供奉官嘗擒陝右羣盜解延州圍除并代州  
都監加內侍押班進鈐轄徙鄜延還爲押班懷智高寇  
廣南以爲湖南江西路安撫副使出桂林請于宣撫使  
狄青願獨當一隊以自效於是使將左方兵力戰于邕  
州事平領綿州防禦使張貴妃之喪過制皆劉沆王洙  
與全彬共爲之遷至入內副都知領信武軍留後後爲

延福宮使卒贈太尉定武軍節度使諡恭僖

雷允恭開封人初爲黃門頗慧黠遷至西京作坊使普  
州刺史入內侍省押班真宗崩章獻后臨政丁謂潛  
結允恭凡機密事令傳達禁中由是允恭勢橫中外及  
爲山陵都監司天監邢中和爲允恭言今山陵上百步  
法宜子孫類汝州秦王墳允恭曰何不就中和曰恐下  
有石與水爾允恭曰上無他子若如秦王墳何不可中  
和曰祇恐覆按不及七月之期耳允恭曰第移就上穴  
我走馬入見太后言之允恭入白其事章獻意不然曰  
出與山陵使議可否時丁謂爲山陵使允恭具道所以

謂唯而已既而上穴果有石石盡水出允恭竟以是  
并坐盜金寶賜死籍其家中和流沙門鳥謂竄海上

任守忠字稷臣蔭入內黃門累轉上御藥供奉章獻時  
守忠與都知江德明等交通請謁權寵過盛仁宗親政  
通謫監英州酒稅遷至宣政使洋州觀察使爲入內都  
知帝未有嗣屬意英宗守忠議援立昏弱以微大利及  
英宗立拜宣慶使安靜軍留後守忠又語言誕妄離間  
兩宮知諫院司馬光請誅之英宗猶未行宰相韓琦出  
空頭敕一道叅政歐陽脩已簽趙槩難之脩曰第書之  
韓公必自有說琦坐政事堂立守忠庭下曰汝罪當死

貶保信軍節度副使蘄州安置填救卽日押行琦意以爲緩則中變也久之爲左武衛將軍致仕卒

閻文應開封人承翰子也遷至入內副都知仁宗時宰相呂夷簡與文應相結郭后之廢文應有力焉后旣廢楊尚二美人益寵專夕仁宗體爲弊或累日不進食楊太后亟以爲言仁宗未能去文應早暮入侍言之不已仁宗厭其煩強應曰諾文應卽以氈車載二美人出二美人涕泣詞說云云不肯行文應罵曰官婢尚何言驅使登車旣而仁宗欲復后文應大懼會后有小疾挾醫診視數日暴崩累至昭宣使恩州團練使時諫官劾其

罪請并其子士良出之二美人之出宮也左右引陳氏  
女入宮父號陳子城楊太后嘗許以爲后宋綬不可王  
曾呂夷簡蔡齊相繼諫陳氏女將進御士良聞之遽見  
仁宗曰子城使大臣家奴僕官名也陛下納其女爲后  
無乃不可乎仁宗遽命出之文應後徙相州鈐轄卒贈  
邠州觀察使

藍繼宗字承祖南海人事劉鋹爲宦者歸朝年十二遷  
爲中黃門歷事太宗真宗仁宗遷至左驕驥使忠州防  
禦使歷昭宣宣政宣慶使累上章求致仕以景福殿使  
邕州觀察使家居養疾卒諡僖靖繼宗謙謹每領職未

又輒請罷家有園池退朝卽亟歸謂同列曰我欲種花  
弄游魚爲樂爾景福殿置使自大中祥符間至繼宗  
授者纔三人

張惟吉字祐之開封人補入內黃門累遷如京使果州  
團練使領皇城司卒諡忠安惟吉任事久頗見親信而  
言弗阿徇張貴妃薨將治喪惟吉曰事干典禮須聞宰相  
旣而宰相不能執議惟吉深非之

甘昭吉字祐之開封人初以內侍殿頭爲英韶州巡檢  
捕盜有功累遷入內副都知英宗以翊衛功遷至供備  
庫使康州刺史昭吉奏曰先帝知臣朴直自小官拔用



至此分當從葬今願得洒埽陵寢足矣帝愛其忠特授  
求昭陵使加知京使還朝表辭職以左龍武軍大將軍  
致仕卒昭吉敦實真密人士稱之

李憲字子範祥符人由入內黃門稍遷供奉官神宗初  
數論邊事合旨王韶上書請復河湟命憲往視師與韶  
進收河州遂爲熙河經略安撫司幹當公事會未征合  
兵攻破踏白城圍河州憲破木征降之以功加昭宣使  
嘉州防禦使既還朝令乘驛計議秦鳳熙河邊事諸將  
皆聽節度御史中丞鄧潤甫等極論其不可章再上弗  
聽冷維朴誘山後生羌擾邊木征請自效衆以爲不可

憲聽之往殺獲萬計斬冷雞朴董氈懼卽遣使奉誓致  
順累遷宣慶使時兵餉不繼詔憲兼經制財用裁冗費  
什六元豐中五路出師討夏國憲領熙秦軍至西市新  
城復蘭州城之請建爲帥府帝又詔憲領兵直趣興靈  
董氈亦稱欲往宜乘機協力入掃巢穴憲旣不能至靈  
州董氈亦失期師無功憲欲以開蘭會邀功弭責同知  
樞密院孫固論之帝釋弗誅復上再舉策兼陳進築五  
利且從之會李舜舉入奏具陳師老民困狀乃罷兵趣  
憲赴闕進景福殿使武信軍留後復還熙河仍兼秦鳳  
軍馬夏人入蘭州破西關降宣慶使又坐妄奏功狀罷

內省職事哲宗立改永興軍路副都總管提舉崇福宮  
御史中丞劉摯論憲貪功生事連貶右千牛衛將軍分  
司南京居陳州卒紹聖初贈武泰軍節度使謚敏恪同  
時有宋用臣者神宗每訪以外事權勢震赫朝士如進  
者爭諂附之元祐初自宣政使貶紹聖遷至蔡州觀察  
使入內副都知卒贈安化軍節度使謚僖敏王中正者  
神宗命經度熙河言可狀遂從王韶入治城壁守具  
已而受詔會師靈州失期糧絕士卒多死坐貶元祐再  
貶紹聖復嘉州團練使卒石得一者元祐初坐管皇城  
殘刻降左藏庫使卒贈隨州觀察使三人並開封人劉

摯論其罪合李憲爲四凶云

張茂則字平甫開封人歷事神宗進入內都知累乞退休言廩食過量積而未請者七年乞令三司毀券詔褒之仍進其官哲宗遷寧國軍留後加兩省都都知卒年七十九茂則性儉素紹聖論元祐人以茂則嘗預任使追貶左監門衛將軍崇寧中入黨籍

李舜舉字公輔開封人神福其曾祖也舜舉少補黃門事仁宗英宗神宗遷至內侍押班制置涇原軍馬五路師出無功議再舉李憲督饋糧民懲前役死於東餒皆憚行出錢百緡不能雇一夫至械縣令以督不能集舜

舉入奏乃罷兵退詣中書王珪迎勞之曰朝廷以邊事屬神班及李留後無西顧之憂矣舜舉曰四郊多壘卿大夫之辱相公當國而以邊事屬二內臣可乎內臣正宜供禁庭洒掃豈可當將帥之任聞者代珪慙焉轉嘉州團練使沈括城永樂遣舜舉計議被圍急斷衣襟作奏曰臣死無所恨願朝廷勿輕此賊尋以死聞贈昭信軍節度使諡忠敏舜舉資性安重與人言未嘗及宮省事頗覽書傳能文辭筆札神宗嘗書數語賜之曰李舜舉公忠奉上恭勤檢身始終惟一以安以榮

梁從吉字君祐開封人補入內高班熙寧初爲邠寧環

慶路駐泊兵馬鈐轄敗夏人獲其酋領又討平寧州叛卒以功升都鈐轄累官求州團練使爲副都知贈成德軍節度使諡敏恪李祥者亦開封人以材武爲兵馬都鈐轄在熙河二十年以宣慶使內侍押班卒

陳衍開封人累官左藏庫使文州刺史出爲真定路都監紹聖中御史來之邵言衍在宣仁垂簾日怙寵驕肆張商英亦論衍交通宰相御服爲之賜珠結託詞臣儲祥爲之賜膳蓋指呂大防蘇軾也衍坐貶監郴州酒稅務劉惟簡以援引張士良梁知新以黨附皆得罪已又編管白州徙配朱崖章惇起獄誣元祐諸大臣云結衍

輩謀廢立士良嘗與衍同在宣仁后閣自郴州召便實  
之士良但言宣仁彌留之際衍嘗可否二府事及用御  
寶付外而已鍛鍊無所得安惇蔡京乃奏衍疏隔兩宮  
斥隨龍內侍十餘人于外以剪除人主腹心羽翼意在  
動搖大逆不道乃詔處死

程昉開封人熙寧初爲河北屯田都監累遷達州防禦  
使制置河北河防水利恃慢豪橫爲御史盛陶所論始  
王安石興水利故驟用昉昉挾安石勢慢韓琦後安石  
覺其虛誕亦疎之以憂死贈輝州觀察使遂罷都大制  
置河防水利司

蘇利涉字公濟初爲入內內品歷事仁宗英宗神宗至  
內侍押班副都知轉海州團練使卒年六十四贈奉國  
軍節度使謚勤僖利涉嘗幹當皇城司循故事廂卒邏  
報不皆以聞後石得一代之事無巨細悉以奏往往有  
緣飛語受禍者人始以利涉爲賢

童貫少出李憲之門性巧媚以供奉官主明金局于杭  
始與蔡京游京進貫力也京旣相贊策取青唐因力薦  
貫用李憲故事監王厚軍累遷武康軍節度使加檢校  
司空恃功驕恣所置將吏皆捷取中旨不復關朝廷浸  
拂京意及除開府京曰使相豈應授宦官不奉詔政和



初進檢校太尉使遼或言宦官爲上介國無人乎帝曰  
遠聞貫破羌故欲見之且因以覘國耳使還歷開府儀  
同三司簽書樞密院河西北兩房不三歲領院事更武  
信等九鎮太傅涇國公時稱蔡京爲公相因稱貫爲媼  
相將秦晉銳師深入河隴薄于蕭關古骨龍謂可制夏  
人死命遣大將劉法取朔方法不可貫逼之法不得已  
出塞遇伏死法西州名將旣死諸軍恟懼貫隱其敗以  
捷聞百官入賀切齒莫敢言初使遼得馬植歸薦諸朝  
遂告謀取燕選健將勁卒刻日而發會盜方臘起即移  
師討臘以童貫譚稹爲宣撫制置使宣和二年十月也

三年四月生擒臘及妻子偽相方肥等四年餘黨平進  
貫太師徙國楚已而貫領陝西兩河宣撫使蔡攸副之  
貫與蔡京王黼共主馬植之謀鄭居中种師道先後力  
陳非計皆拒之遂督師道及辛興宗分兵伐遼並敗績  
遼以黨叛棄好遣使來責貫不能對語在師道傳七月  
貫與攸再舉伐遼朝散郎宋昭上書諫謂金必敗盟爲  
中國患乞誅童貫王黼馬植等昭坐竄十月貫遣將劉  
延慶同郭藥師取燕又敗績貫懼得罪密遣使懇金夾  
攻金既克燕以六州地與宋貫以功爲真三公加封徐  
兩國越兩月命致仕明年復起宣撫河北燕山七年

用神宗遺訓能復全燕之境者胙本邦疏王爵封貫虜  
陽郡王時金復許宋雲中地帝遣貫往交割而金兵已  
南下貫在太原得粘罕書責納張覺事且索河東河北  
地以大河爲界庶存宋宗社貫氣褫謀遁歸守張孝純  
謂之曰王當合天下兵悉力枝梧何乃委之而去貫叱  
曰貫受命宣撫非守土也孝純嘆曰平生童太師作幾  
許威望及臨事乃蓄縮畏懾奉頭鼠竄何面目見天子  
乎貫奔歸欽宗已受禪以爲東京留守貫不受奉上皇  
南幸物議蜂起連謫貫昭化軍節度副使竄吉陽軍未  
至詔數十罪斬於南雄函首梟都市貫狀魁梧偉觀視

顧下生須十數不類閹人妃嬪以下皆獻餉結內握兵  
二十年權傾一時輔弼岳牧多出其門云

方臘者青溪人世居縣場村素託左道惑衆因花石之  
擾聚羣不逞以誅朱勔爲名自號聖公建元永樂置官  
設將以巾飾爲別自紅巾而上凡六等脅居民益之不  
旬日衆至數萬陷青溪睦州歙州武卽蔡遵顏坦郭  
師中知縣宋旅先後戰死又陷杭州殺制置使陳建廉  
訪使趙約又陷婺州衢州衢守彭汝方罵賊而死屠其  
城又陷處州凡得官吏必繫支體探肺腸或叢鎬亂射  
備盡楚毒以償怨宰相王黼匿不以聞凶焰日熾附者

愈衆東南大震發運使陳遘奏至徽宗始大驚爲罷應  
奉局移董貫北伐之兵討之臘敗於秀州還據幫源峒  
中爲韓世忠所擒云

梁師成字守道慧黠習文法稍知書得幸徽宗至竄名  
進士籍積遷至節度使檢校太傅遂拜太尉開府儀同  
三司徽宗留意禮文符瑞師成善逢迎御書號令皆出  
其手多擇善書更習帝書雜詔旨外廷莫能辨師成自  
言蘇軾出于是時天下禁誦軾文師成訴於帝自是軾  
之文乃稍出以翰墨爲已任多寘書畫卷軸於外舍邀  
賓客縱觀得其題識合意者輒密加汲引王黼父事之

蔡京父子亦諂附焉都人目爲隱相所領職局數十百  
黼造伐燕議師成贊決之又薦譚稹爲宣撫燕山平策  
勳進少保益通賄謝鄆王楷寵盛有動搖東宮意師成  
力保護欽宗立嬖臣多從上皇東下師成以舊恩留於  
是太學生陳東布衣張炳論其穰定策功當正典刑帝  
猶未誦言逐之久乃責彰化軍節度副使開封吏押行  
次八角鎮縊殺之以暴死聞籍其家

楊戩少給事掖庭主掌後苑善測伺人主意自崇寧後  
日有寵勢與梁師成埒歷節度使加至太傅遂謀撼東  
宮有胥吏杜公才者獻策于戩立法索民田契自甲之

乙乙之內展轉究尋至無可證則度地所出增立賦租擢公才爲觀察使宣和三年戩死平彥繼其職彥天資狠愎密與王黼表裏置局汝州臨事愈劇凡民間美田使他人投牒告陳皆指爲天荒魯山闔縣盡括爲公田訴者輒加刑致死千萬京西提舉官及京東州縣吏劉寄任輝彥李士漁王潁毛孝立王隨江惇呂垓錢棫宋憲皆助彥爲虐民不勝忿痛發物供奉大抵類朱勔如龍鱗薜荔一本輦致之費踰百萬禍福轉手因之得美官者甚衆穎昌兵馬鈐轄范寥不爲取竹誣刊蘇軾詩文爲十惡勒停靖康初詔追貶官爵彥削官賜死籍其

家劉寄以下十人皆停廢復范寥官

馮世寧字靜之以入內黃門累遷昭宣使忠州團練使  
入內押班歷事哲宗徽宗以內客省使彰化軍留後致  
仕世寧出入禁闥六十年循謹無過卒贈開府儀同三  
司諡恭節

邵成章初從高宗幸揚州金人掠陝西京東諸郡羣盜  
起山東黃潛善汪伯彥遣不以聞及張遇焚真州去行  
在六十里帝亦不之知也成章疏條二人罪曰必誤國  
且申二人使聞之帝怒除名南雄州編管侍御史馬伸  
言今何時以言爲諱父之帝召赴行在其徒忌之譖曰



邵九百來陛下無歡樂矣遂止之于洪州金人入洪聞其名訪求得之謂之曰知公忠正能事吾主可坐享富貴成章不應脅之以威亦不從金人曰忠臣也吾不忍殺遺之金帛而去

關禮高宗朝積官保信軍承宣使孝宗頗親信之後命提舉重華宮孝宗崩光宗疾不能執喪樞密趙汝愚等請建儲以安人心禮卽入宮泣告太后以時事可憂狀遂立嘉王事具本紀及汝愚傳禮尋除入內內侍省都知遷中侍大夫禮不以功自居乞致仕不許乞免推恩又不許南渡後內侍可稱者惟邵成章與禮云

藍珪康復初皆爲康王府都監入內東頭供奉官既即位恃恩用事履尤妄作威福大將劉光世等多曲意事之俄遷內侍省押班金州觀察使建炎三年帝在揚州金兵卒至帝馳馬出門百官不戒備從行者惟履等五六人自是履等益自銜愈有輕外朝心及幸浙道吳江其黨競以射鴨爲樂比至杭州江下觀潮中官供帳赫然遮道統制苗傅等切齒與武功大夫劉正彥謀共除之王淵躋樞筦正彥以爲由宦者所薦愈不平謀遂決伏兵斬淵遣兵圍履家履馳入白帝傅等至厲聲乞康履藍珪曾擇等誅之以謝三軍帝降傅等官傅等曰欲

遷官第須控兩匹馬與內侍何必至此帝不得已遣人  
執履至履望帝呼曰大家何獨殺臣遂以付傅卽腰斬  
之梟其首帝幸睿聖宮傅等留內侍十五人奉左右尋  
捕珪擇等皆編置遠州擇昭州行一程追還斬之事具  
苗傳傳等誅贈履官謚榮節召珪等還遷至內侍省  
都知珪與履同進而驕橫不及履故以壽終有安石者  
與珪同姓爲內侍省副都知至景福殿使湖州觀察使  
卒贈保寧軍節度使謚良恪渡江後中官贈謚自安石  
始又有與履同姓者名諝爲內侍省押班亦親幸用事  
至均州觀察使卒贈保信軍節度使謚忠定

馬益初給事康王邸王卽位恃舊恩驕恣帝幸浙東益與都統制張俊爭渡以語侵俊且訴于帝事下御史臺侍御史趙鼎論之事乃已累遷明州觀察使會劉豫揭榜山東言益遣人收買飛鴿因有不遜語張浚請斬益以釋謗帝不許鼎言事關國體當解職加罰自是家居廩祠者十四年坐驗太福帝姬不實送昭州編管尋以皇太后連姻得免卒于家初徽宗改公主爲帝姬靖康之難女二十人俱北遷柔福其一也開封有尼李靜善者內人言其貌似柔福靜善卽自稱柔福事聞高宗封公主適防禦使高世榮其後內人從顯仁太后歸言其

善伏誅益遂抵罪云

引去爲內侍張見道養子也遷至入內內侍省都知高宗末年去爲煩恃恩干外朝謀議金人叛盟陰沮用兵進幸蜀之計宰相陳康伯力非之侍御史陳俊卿乞斬去爲以作士氣壯華老復以髡兵事彈治乃致仕及內禪落致仕提舉德壽宮又特遷安慶軍承宣使卒

陳源淳熙中頗有寵顯恣孝宗聞而惡之詔與祠言者劾之乃謫建州居住籍其貲進德壽宮言者猶未已移源郴州源有園名小隱其制視禁籞有加高宗以賜王才人光宗卽位復召還紹熙四年自永州防禦使除入

內侍省押班帝以疾不朝重華宮源與內侍楊舜卿  
林億年數有間言寧宗卽位御史章穎論之詔罷源等  
官竄之後卒聽自便億年養娼女於別業源在貶所以  
淫媒聞人疑其非宦者

甘昇內侍省押班澤之子累遷亦至押班乾道中昇頗  
用事與曾覲王朴相盤結旣而覲死朴逐獨昇在朱熹  
力言之黃由對策亦及之後帝察其姦遂抵罪籍其貲  
竟以廢死弟昺寧宗初爲內侍省都知帝過壽康宮昺  
有力焉遷官二秩頗貴寵昺同時王德謙亦以給事嘉  
邸被親信遷至昭慶軍承宣使驕恣踰法外朝多附之

中書舍人王旦事之尤謹韓侂冑與德謙爭用事擠之  
與外祠連被論廢斥以死

董宋臣有寵理宗朝聲焰薰灼洪天錫劾之天錫坐左  
遷開慶初元兵駐江上京師大震宋臣贊帝遷幸寧海  
軍簽判文天祥上疏乞誅之不報景定四年自保康軍  
承宣使除入內內侍省押班廷臣論宋臣不置帝曲爲  
諭解庇之既卒猶命轉節度使

宋史新編卷一百八十四

五